



**EGEMEN QAZAQSTAN**

## Әл-Фараби мерейтойы ЮНЕСКО аясында тойланады

2019 жылғы 12-27 қараша аралығында Франция астанасында өткен ЮНЕСКО-ның 40-шы Бас конференциясы ортағасырлық Шығыстың ғұлама ойшылы әрі ғалымы Әбу Насыр әл-Фарабидің 1150 жылдығын және Шымкент қаласының негізі қалануының 2200 жылдығын келесі жылы атап өтілетін халықаралық мерейтойлар тізіміне енгізу жөнінде арнайы қарар қабылдады.



Ұйымға мүше 193 мемлекеттің ортақ шешіміне сәйкес ЮНЕСКО Хатшылығына аталған мерейтойлар аясында өткізілетін іс-шараларға қатысу тапсырылды.

Бас конференцияның пленарлық жиналысында Қазақстанның Франциядағы елшісі әрі ЮНЕСКО жанындағы Тұрақты өкілі Жан Ғалиев мүше мемлекеттерге еліміздің ұсыныстарын қолдағандары үшін алғыс білдіріп, оларды аталған мерейтойларға және қазақтың ұлы ақыны әрі ойшылы Абай Құнанбайұлының 175 жылдығына орай елімізде және шетелде өткізу жоспарланып отырған іс-шараларға қатысуға шақырды.

40-шы Бас конференция бекіткен тізімге 53 мүше мемлекеттің ұсынысы енді, солардың арасында – көне түркі жазуының аса маңызды үлгілерін қамтитын Білге қаған мен Тоңықұқ (Тоңыкөк) ескерткіштері орнатылуының 1300 жылдығына арналған іс-шараларға ЮНЕСКО-ның қатысуы жөнінде түркітілдес елдер мен Моңғолияның бірлескен ұсынысы да бар.

Бас конференцияның жалпы саяси дебаттарында сөйлеген сөзінде елші Ж. Ғалиев алқалы жиынды елімізде білім, ғылым және мәдениет салаларының кешенді дамуын қамтамасыз ету бойынша мемлекеттік саясат және Мемлекет басшысының «Сындарлы қоғамдық диалог – Қазақстанның

тұрақтылығы мен өркендеуінің негізі» Жолдауындағы тиісті қағидалар жөнінде хабардар етті.

Отандық дипломат атап өткендей, Жібек жолы қалыптасып, Алтын Орда өркендеген замандардан бері еліміз өркениеттер мен мәдениеттер үнқатысуының жаһандық дәрежеде маңызға ие орталықтарының біріне айналды.

Осы орайда Қазақстан Біріккен Ұлттар Ұйымы аясында Мәдениеттер жақындасуының халықаралық онжылдығын (2013-2022 жж.) өткізуді ұсынғаны заңды құбылыс. Елбасының бастамасымен Алматыда ЮНЕСКО қамқоршылығымен Мәдениеттер жақындасуының халықаралық орталығы құрылды және 2019 жылы маусым айында Ұйым хатшылығы мен Қазақстан Үкіметі оның қызметінің ережелері туралы келісімге қол қойды.

Елшінің айтуынша, Қазақстан білім, ғылым, мәдениет, телекоммуникациялардың дамуы, гендерлік теңдік салаларындағы халықаралық ынтымақтастыққа белсенді қатысып тұрады. Осы орайда ол ЮНЕСКО Бас конференциясын соңғы он жылда Қазақстанның жоғары және кәсіптік білім орындарында Ауғанстанның шамамен 1000 дарынды жастарына, соның ішінде жүздеген қыздар мен келіншектерге, бейбіт өмірде қажетті мамандықтар бойынша тегін білім берілгені жөнінде хабардар етті.

Бас конференция аясында Қазақстан Жібек жолы бойында орналасқан елдердің мәдени-гуманитарлық ынтымақтастығын ынталандыру жөніндегі ЮНЕСКО жобасына және осы ғылымның дамуына әл-Фараби айтулы үлес қосқанын ескере отыра 14 қаңтарды Әлемдік логика күні ретінде белгілеу жөнінде қарарларды қолдады.

Сонымен бірге алқалы жиын шеңберінде 120-дан астам мүше мемлекет өкілдерінің, соның ішінде Қазақстанның Мәдениет және спорт министрі Ақтоты Райымқұлованың қатысуымен мәдениет министрлерінің дүниежүзілік форумы өтті.

Бас конференция аясында, сондай-ақ жоғары білімде біліктіліктерді мойындау жөніндегі Жаһандық конвенция қабылданды. Әлемнің дербес өңірлері арасында академиялық мобильділік үшін халықаралық-құқықтық негіздерді нығайтатын құжаттың әзірленуіне Қазақстанның Білім және ғылым министрлігінің мамандары да өздерінің мазмұнды үлесін қосты, деп хабарлады Сыртқы істер министрлігінің баспасөз қызметі.